

王文敏公遺集

王文敏公遺集卷第三

福山王懿榮著

吳興劉承幹編

奏疏

謝南書房行走疏

光緒二十年五月初八日

奏爲恭謝

天恩仰祈

聖鑒事本月初七日內閣奉

上諭翰林院侍讀王懿榮著在南書房行走欽此竊

臣

世受

國恩列翰林者後先五代身叨館職躋清華者迢遞十年未報涓埃祇食名氏加以諫垣預選

察典濫膺今年東觀

掄才既荷

綸褒於異數曩歲北門

召試重蒙

簡在以真除聞

命自

天抱慚無地伏念

臣

隸籍東土空號齊魯經生入直

南齋愧無燕許手筆而且事對虧九史長歎三敏速何

能侍從恐負祇以受

恩愈重報稱彌艱惟有箴厲多言思不出位戒深素食
業在於勤從茲勉竭愚誠懍夙夜敬公之義庶幾漸臻
通曉副

朝廷特達之知所有

微臣

感激下忱謹繕摺叩謝

天恩伏祈

皇上聖鑒謹

奏

呈進擬補承華事略疏

奉

敕擬補承華事略圖並校正訛字屬稟告竣謹奉

表上

進者竊

臣卹

等於本年七月初二日奉到

懋勤殿發下承華事略鈔本一冊

殊諭承華事略一部著南書房翰林每段繹其義爲圖
繕具清單呈覽書中有無訛舛之處並著查閱欽此

臣

等齋祓祇承誠惶誠恐伏以書分纂注宋元標經子之
門畫列儒先湘澤傳神工之壁類皆丹青遙託人物攸
分良由恍目而警心特重左圖而右史欽惟

皇帝陛下修和庶政

覆幬羣生

金祀承歡

媲翠嬀之五十而慕銅籤待曉

法蒼姬之朝昃不遑

摘奎藻於

辰居潤灑

帝鴻之硯

誦瑤編於乙夜

勤披天鹿之儲

臣等仰覲

聖顏親聆

寶訓謹悉近日於

御書房所列舊鈔本書內檢得此編巨冊輝煌與魏徵
鄭公諫錄相鱗次前型彪炳較焦竑養正圖解爲雅馴
喜茲故事之駢羅宜備

幾餘之瀏覽不遺葑菲無擇壤流巍蕩難名共仰

宸衷沖穆淵涵莫測彌彰

聖學高深謹案元臣王惲當裕皇居東宮之日實燕南
爲副使之官特撰徽言上呈鵬祭其名與文王世子相
表裏其實與唐宗帝範相後先啟序並稱釐爲六卷篇
凡二十圖亦附焉

四庫館開已登夫秋澗大全之集

重華

欽定閒采入儲貳金鑑之編從來輾轉流傳莫覩弛張
遺迹譬彼書垂無逸而唐宋璟手翰靡存詩重豳風而
趙孟頫繪毫已鈔揆諸燦列圖書之說祇益瞢容回憶
傳觀宮禁之年應歸完璧爰遵

明詔勉繹新圖據三十九段之成文補第四十條於跋
尾取鑑不遠漢武梁之石畫常存作則因心晉束皙之
笙詩可補雖別風惟雨原書之譌誤尙多而脫簡佚文
坊本乃支離已甚詳爲是正誌以標題謹列綈面復上

塵於

黼座重新彩管猶待

詔於

睿裁

臣等

禁幄叨趨

綸音仰體樛材自審慚閣立本之偏長粉本能摹埃吳
道元之勝事所願神光照

殿快覩吹銅御戶之徵更欣

祕閣刊書長留累葉

傳心之要所有校正

內府鈔本一冊案段繹圖一分謹奉

表隨

進以

聞

額請暫停點景但行朝賀疏

光緒二十年九月

奏爲訛言可慮籲請暫停點景但行

朝賀以靖肘掖而弭不虞恭摺仰祈

聖鑒事竊

臣

等伏讀八月二十六日

上諭欽奉

慈禧端佑康頤昭裕莊誠壽恭欽獻崇熙皇太后懿旨

本年十月予六旬慶辰典禮著仍在宮中舉行等因欽此仰見思患豫防明見萬里曷勝欽佩第念耳目之觀非

聖懷所役而

臺萊之祝實

臣下同殷一旦撤停在瞻仰

盛典者豈乏向隅之望以故承辦諸

臣於裁減之中仍

寓鋪張之意

臣等歡忻下悃何獨不然惟伏聞近日倭

人行踪詭秘津沽內外不乏華奸日來都城多出面生

可疑之人以瞻仰點景爲名形狀凶惡行藏靡定民情

驚駭竟有置

盛典而不觀反思往鄉村遁逃爲避居計者連日洋人紛紛出京各處教堂種種聚談不一若點景依然熱鬧止係稍移地段萬一偶然不警匪徒乘機竊發臣等備員差使縱有意外不足爲惜而變生肘掖恐非六班及周廬直宿諸大臣一時所能猝辨應如何防患未然之處用敢籲請

聖明深維事理況

皇太后膺

天鍾慶福冠古今轉盼

七旬萬壽近在十年

期頤億齡非可數計將來紅旗報捷隨時補行何時非
萬壽之時何日非祝釐之日此際安危所係實在呼吸
之時必區區於一半月之內汲汲鋪張諸臣所見誠爲
未廣臣等忝同儕直既有聞見不敢不具摺密陳伏祈
聖鑒謹

奏

時事孔亟請召用親賢疏

光緒二十年九月初一日

奏爲時事孔亟請

召用親賢事竊倭人肇衅平壤淪胥衛葉逃潰左馬傷
亡倭師侵及鵬淥救兵雖多漫無統制徵調各將無爭

勝之意有相妒之能列城瓦解事在意中

興京

盛京係

三陵所在一有挫折勢將有不忍言者必須曾辦軍務
通曉洋情之重臣在

帝左右朝野方恃以爲安伏查恭親王前因多病

恩予退閒近聞醫言知於秋來氣體康復實足以勝艱
鉅之任倘蒙

天恩迅卽

召用其於布置將帥聯絡與國震懾強鄰皆可以上佐

宸謨下字眾望倘該親王以病爲辭伏懇

諭旨堅勿允許諒該親王身受

厚恩際此時事多艱亦必不敢出此也伏乞

聖鑒施行謹

奏

謝崇烈中式舉人疏

光緒二十年九月十二日

奏爲恭謝

天恩仰祈

聖鑒事本月十一日順天鄉試榜發

臣

子崇烈中式第

三十二名舉人竊

臣

猥以庸材渥承

寵眷一家累世受

國厚恩四甲午迭舉賢書敢謂析薪克荷

萬壽年聿開名榜詎期芳桂重攀

臣

子崇烈質本蠢愚

年猶穉弱忝預鹿鳴之選彌增燕翼之慙伏念漢舉孝廉必循名而核實唐開科目亦先行而後文臣惟有益矢靖共勉加策勵敢存犢愛俾無忘編瘁於中宵稍竭驚資庶仰報

高深於來日所有

微臣

感激下忱謹繕摺具

奏伏乞

皇上聖鑒謹

奏

詳度夷情審量時局疏

光緒二十年十一月初四日

奏爲詳度夷情審量時局仰祈

聖鑒事竊自倭人肇釁擾我邊隅鳳凰不守而陸賊全
度毀江旅順不守而水賊亦超北海我與倭寇勢無兩
全頃者瀕海一帶逢冬大雪寇性畏寒旣據要害藉此
休息陰謀布置兼之彼國空虛外強中乾久成弩末若
以和議遽來夷情莫測願

皇上勿輕許也何以言之我之虛實彼已知之彼之所
缺者錢耳和議猝成鉅款將至輸將逮半而秣厲重來

挾我之資便以攻我近則半載遠或數年中國無安枕之日是益寇糧而資之盜也趁此大兵雲集精厲士馬厚積軍火肅清海隅使其畏服切誓有堅不敢再犯之心而後從容講信示以威福斷在

聖志倭寇狡詐有非泰西諸國可比一旦反噬人心渙散過於今日若和議暫成兵不能散勞師糜餉終無了期是不以之戰賊而以之坐耗糧糈羅掘一空民暑可畏以億萬姓之脂膏半以貽寇半以防邊

國家將有內潰之患不可不慮

臣受

恩甚重事機甚急不敢緘默削牘上陳伏乞

皇上聖鑒謹

奏

重疏前請整理孔子祀田并清查地產疏

光緒二十年十

一月初四日

奏爲重疏前請懇

恩整理

至聖先師孔子祀田并飭疆臣清查衍聖公府地產事

竊臣於光緒十五年六月在編修任內曾經呈請

臣

掌院學士代奏懇

恩飭下山東巡撫整理衍聖公府地產一摺當蒙

恩旨寄諭山東巡撫遴派妥員前往曲阜會同地方官
詳細確查應如何設法整頓之處卽着據實摺

奏請

旨辦理嗣經山東巡撫張曜遵

旨覆查具奏大概情形在案仰見我

皇上尊師重道嘉惠聖裔振厲風俗之至意海內臣民
同聲感佩巡撫張曜旋以病故出缺後任撫臣未及清
理迄至於今臣恭查嘉慶朝

欽定大清會典事例卷一百三十九戶部十二田賦門
免科田地下載有衍聖公祭田二千一百五十七頃五

十四畝零四氏學學田五十頃復聖裔祭田墓田廟基地五十四頃十有五畝零宗聖裔祭田墓田廟基地六十二頃十有四畝零亞聖裔祭田墓田廟基地五十九頃七十六畝零先賢仲氏裔祭田墓田廟宅地七十五頃五十六畝零康熙二十四年覆准孔林地於原額外增擴十有一頃十有四畝九分除免賦稅又覆准撥給元聖周公祭田五十頃此

會典所載衍聖公祭田暨先賢元聖祭田墓田之大數也臣又覆查乾隆間戶部主事孔繼汾所著闕里文獻考卷二十六戶田第七所載衍聖公土田之制由漢及

宋時賜時替自宋大中祥符間始專有祀田沿及金元
代多增給明洪武時定給祭田二千大頃歲收其租入
以供廟祀餘悉爲衍聖公廩祿

國朝因之明太祖洪武元年賜祭田二千大頃分爲五
屯四廠十八官莊撥佃戶承種永樂五年二月又賜贍
廟田七十三大頃正統四年八月戶部奏准存佃戶五
百戶湊人二千丁專以辦納籽粒以供祭祀

國朝順治元年秋九月山東巡撫方大猷題准仍沿舊
制又明時衍聖公有湯沐地大畝八十二頃有奇在順
天府屬東安等五縣未詳爲何年所賜

國初圈入旗地七十大頃留下東安縣地十二頃有奇
順治十年

詔以山東德魯二藩莊地照數補給此歷代及我

朝頒賜祀田之犬凡如此今析而數之凡爲屯者五曰
鄆城曰鉅野曰平陽曰東阿曰獨山爲厰者四附於各
屯而闕東阿爲官莊十有八在曲阜者十有二曰張辛
莊曰城西大莊曰春亭莊曰紅廟莊曰齊旺莊曰南池
莊曰安基莊曰齊旺坡曰顏孟莊曰馬州坡曰下地屯
曰胡二窩在泗水者四曰西岩莊曰安寧莊曰魏莊曰
戈山厰在鄒縣者二曰魯源莊曰黃家莊鄆城原額屯

廠地六百二頃鉅野原額屯地七十六頃獨山原額市
廠地二百二十頃四十三畝六分二釐四毫四絲七忽
曲阜原額官莊地六十四頃五十五畝泗水原額官莊
地六十二頃八十畝二分七釐五毫五絲三忽鄒縣原
額官莊地十七頃二十一畝一分通計五屯四廠及十
八官莊原額地共二千大頃但現在地畝統計荒熟鄆
城存屯地三百六十七頃一十五畝五分八釐二毫六
絲三忽廠地五十四頃七十二畝五分六釐四毫鉅野
存屯地一百八十六頃二十四畝一分七釐廠地三十
頃三十畝三分四釐平陽存屯地二百三十一頃一十

畝九分四釐一毫七絲廠地十二頃七畝四釐六毫東
阿存屯地三十二頃六分一釐四毫七絲獨山存屯地
六十一頃七十五畝五分四釐廠地二頃七十四畝七
分二釐曲阜十二官莊存地六十頃五十六畝九分五
毫四絲四忽泗水四官莊存地五十一頃七十三畝八
分一釐三絲鄒縣二官莊存地六頃五十四畝二分二
釐三毫七絲通計五屯四廠十八官莊共見存荒熟地
一千九十六頃九十六畝四分五釐八毫四絲七忽較
二千原額缺地九百三頃三畝五分四釐一毫五絲三
忽此外又有洸河屯地七十三大頃在滋陽袁家莊者

五十頃顏村店者二頃故縣村者一頃在濟寧州杏村
庄者二十頃卽永樂五年續賜之地有東平廠地大畝
二十三頃滋陽廠地二十七頃九十一畝四分七釐曲
阜廠地十九頃六畝五分三釐卽順治十年撥補之地
又鄒縣有尼山書院祭田一十三頃五十畝曲阜有明
洪武初賜五十五代衍聖公地一大頃通前共見存地
一千二百五十六頃七十八畝有奇較之

會典所載衍聖公祭田二千一百五十七頃五十畝尙
不及十分之六臣案孔繼汾此書以聖裔說家乘至爲

詳盡此闕里文獻攷所著衍聖公祭田地產之細數也

臣又竊見巡撫張曜覆奏所稱有恭查

會典所載衍聖公祭田二千一百五十七頃五十畝闕里文獻攷所載存地一千二百五十六頃七十八畝內有地畝在運河西南一帶曾爲江南之豐縣山東之賈莊黃水漫口淹沒沙壓租戶藉口朦欠緣田產散在各縣租戶名姓真僞不一此次清查須先令各縣學官約同公正紳士逐一清查以免書役下鄉致多弊混俟辦有頭緒再由該管地方官詳加整頓等語嗣又風聞張曜札飭兗沂漕濟道查辦以衍聖公祀田坐落江蘇沛縣缺額二千餘頃曾於同治八年經前兩江總督曾國

藩撥補八官頃每年代征租價制錢一百四十四千聽候委員守提此項地畝並未指界亦未造送花戶清冊迄今仍係缺額二千餘頃此次該道查辦旋於十六年閏二月據江南沛縣紳董同知劉介思等并獨山屯官唐錫盤以祀田復涸造冊繪圖稟請核辦各等情有圖四幅冊十二本並復沛縣祀田碑文二紙該道請咨轉移兩江總督飭查在案該撫以旣據有屯官唐錫盤職員劉介思所稟涸復之地又有銅山縣沛縣民張義君劉廷聘所稟之地二千餘頃無論是否原失祀田擬請欽遵嘉慶十四年戶部具奏奉

上諭著山東巡撫會同東河總督江蘇巡撫嚴飭地方官備查缺額祀田倘歷年久遠難以清查亦卽另籌撥補期於祀田無缺之

恩旨卽在此項地畝內提撥其如何失迷之處已往不究變通籌撥移咨兩江總督江蘇巡撫會同辦理此事據銅山沛縣官紳所稟一帶涸地而言未及具奏該撫旋卽出缺此張曜覆奏及查辦情形未及遞核之大概也臣惟孔子祀田以及先賢元聖祭田

列朝會典旣經載入田賦一門免科田地項下事隸戶部現在戶部承管各司自當有坐落地方畝數清冊存

卷可查闕里文獻攷所載順治十年撥補地數以及五屯四廠十八官莊坐落縣分畝數則各該縣自當有免糧地畝數目戶房底冊可查卽令水淹沙壓必有荒廢地段可指抑或隱佔私賣報糧升科各該州縣亦必有先後增益糧戶羨額銀數可稽至於張曜所查銅山沛縣紳屯所稟與闕里文獻攷所載地段坐落無涉或卽在戶部所管免科田地祀田之內或爲衍聖公府後來私置之田產臣無從細考若據曾國藩曾經撥補八官頃又經劉介思唐錫釐指稟祀田涸出白屬衍聖公府舊地日久失迷不言可知傳聞涸復之後久爲淮揚道

屬官紳交相侵噬並匿糧不報事同陋規臣伏思此項
祀田及該府地產先賢元聖各祭田既有官書私乘及
東撫訪查情形種種實據可憑惟有仍懇

天恩俯准臣請飭下戶部兩江總督江蘇巡撫山東巡
撫詳細清查案卷調冊妥派幹員隨時辦理其確爲水
淹沙壓荒廢不堪耕種者可否遵照

列聖諭旨撥補之例

恩准量數指撥其有隱佔偷賣報糧升科者一經查明
可否

恩准賞還歸入免科田地舊典項下免其租稅並飭所

屬各州縣出示曉諭仍令原業地戶認佃承種不爲絲毫科罰轉滋紛擾如實在佃種不力仍令於該處就近另擇居民招認佃種官爲酌辦以復該府祀田地產之舊先賢元聖各祭田附近一處亦一律

恩賜清理務使

實惠均霑不至一家向隅今襲封衍聖公孔令貽英年有爲志趣向上俟經此次田產清理之後亦當勤綜家政恪奉先祀勿得再使府官戶屯任意朦混串通勒扣迷失荒蕪以致上負

朝廷德意之厚本年八月上丁

皇上親行釋奠典禮臣以署理國子監祭酒躬勩
盛典仰見修復

兩朝跪獻三獻舊儀又復添入飲福受胙尊崇

先聖隆禮有加而兩省疆臣坐視其後世子孫薄祀失
業衆盛不備饗飧不繼甚非謂也孔子盛德百世必祀
公羊家言春秋之義賢者子孫宜有地也臣不揣冒昧
重申前情籲懇

天恩伏乞

皇上聖鑒謹

奏

再臣前曾奏請修復曲阜尼山泮泗兩書院當蒙

恩旨飭下山東巡撫辦理業經前任撫臣張曜修葺既成後任撫臣福潤又爲籌款銀一萬兩交兗沂曹濟道發商生息俟積有成數以爲脩脯膏火專課四氏學子弟之資風聞承修官重修兩書院偷工減料房舍尺寸俱行縮小當被罰銀四千兩歸入藩司未知是否屬實此項後來亦未悉作何開銷請

旨飭下山東巡撫確切查明如果實有此項可否懇

恩賞給併入前項銀一萬兩內一同交商生息及早添置几案充實堂宇使四氏學諸生課讀其中暫歸現任

四氏學學官先行照管免致虛懸無薄又重複坍塌一俟官紳籌畫經費稍裕再行酌量膏火延請山長以圖久遠臣愚昧之見是否有當謹附片具陳伏祈

聖鑒謹

奏

再曲阜衍聖公府自近歲不戒於火舊藏書籍圖錄焚燬一空現在各直省設立書局以官錢刻書者三十年來珍籍善本燦然大備除以初印精槧一分解送翰林院敬備

皇上取進御覽一分解交國子監充備肄業諸生傳習

外可否懇

恩飭下各直省督撫有書局者無論新舊諸刻本亦以
一分解交山東巡撫轉行曲阜作爲

恩賜衍聖公孔令貽敬謹儲藏以爲誦法之資遇有新
刻陸續咨解如直省官紳家刻經籍有願送曲阜衍聖
公府者仰體我

皇上嘉惠聖裔有加無已之至意亦卽聽其就近呈交
該省官長咨送山東巡撫彙交孔令貽收存今衍聖公
府第旣蒙恩給資重修則書籍亦且

賜予成全

臣

被服儒術飲水思源冒昧瀆陳伏乞

聖鑒謹

奏

光緒二十年十一月初四日奉

上諭翰林院侍讀王懿榮奏請飭整理衍聖公府地產
一摺據稱衍聖公府各項地產載在會典事例及闕里
文獻考頃畝甚詳前次巡撫張曜查出江蘇銅山沛縣
一帶涸田未及具奏請飭查明撥補等語衍聖公府田
產既有官私載籍可憑自無難確切履勘著戶部行知
兩江總督江蘇山東各巡撫按照原奏各節調齊卷冊
分晰查清如數撥補據實具奏另片奏請將修葺曲阜

書院罰欸銀兩發交生息以充四氏學膏火一節著山東巡撫查明辦理又片奏請飭各省將書局所刻經籍解送衍聖公府儲藏等語卽著山東巡撫咨行各省督撫遵照辦理欽此

請重申舊章封禁天下古墓疏

奏爲請

旨嚴飭各省重申舊章封禁天下古墓以廣

皇仁事竊臣伏讀嘉慶朝

欽定大清會典事例內恭載雍正七年

諭自古帝王皆有功德於民雖世代久遠而敬禮崇奉

之心不當弛懈其陵寢所在乃神所憑依尤當加意防衛至於往聖先賢名臣忠烈芳型永作楷模正氣長留天壤其祠宇塋墓亦當恭敬守護以申仰止之忱著各省督撫轉飭各屬將境內所有古昔陵寢祠墓勤加巡視防護稽查務令嚴肅潔淨以展誠恪若有應行修葺之處著動用本省存公銀委官辦理朕見歷代帝王皆有保護古昔陵寢之飭諭而究無奉行之實朕雍正元年恩詔內卽以修葺歷代帝王陵寢通行申飭亦恐有司相沿積習視爲泛常嗣後著於每年年底令該地方官將防護無誤之處結報督撫造冊轉報工部彙齊奏

聞儻所報不實一經發覺定將該督撫及地方官分別議處

聖訓一道又載乾隆十一年

諭前代帝王陵寢及聖賢忠烈墳墓向來均令修葺防護陝西爲自古建都之地陵墓最多有不載在會典內者旣無圍牆又無陵戶著交該督撫查明酌築圍牆以禁作踐以資保護

聖訓一道會典又於防護祠墓事例下載有凡古昔聖賢名臣忠烈祠墓每歲由該地方官將防護無誤之處結報督撫造冊報部彙題專案一條臣又嘗讀大清律

例於禮律下載歷代帝王陵寢專條凡歷代帝王陵寢及先聖先賢忠臣烈士墳墓不許於其上樵採耕種及牧放牛羊等畜又刑律下載發塚專條舊纂新增比例綦嚴仰見我

朝深仁厚澤普洽寰區錫類推

恩無微不至今各直省通志各府廳州縣新舊志中凡著名古墓有不盡載防護之列者而無名古墓隨在尤多去年六月臣以服滿詣省取咨路過青州益都臨淄兩縣地方親見世傳齊桓公景公及齊四王墓者大逾一邱犁耕其上爲畝無多墾作熟田畦野井然爲之慘

目比及省會見山東巡撫臣張曜爲臣言及自黃河改徙遷流無定往往古墓適當其衝或冲陷已見或未卽冲陷必使沿河委員加意防護培以膠土令其不致遽就湮毀查工時留心閱看以考其心地慈良與否臣想江南河南沿河各省此種情形自必隨處多有以臣所聞奉天省屬懷仁縣境內有晉義熙間高句驪好太王墓近年雨水冲擊石穴暴露四壁皆見古丹青畫象雲南曲靖府屬南寧縣境內有晉建寧太守爨寶子墓陸涼縣境內有宋寧州刺史爨龍顏墓碑石猶存邱隴漸湮如此之類誠恐日久傾圯殘毀狼藉至不可問抑臣

又聞之陝西省所屬地方古墓最多一遭陷塌村民紛
紛畚畝爭取古物持以售錢久之習慣奸民嗜利便復
穴取彝器志石之屬以爲奇貨名之曰窩行同發塚尤
屬可恨惟臣見聞淺狹耳目所及已復如此此外更可
類推相應請

旨飭下各直省督撫恪遵會典所載

列聖諭旨重申舊章各於所屬地方勤加巡視其有古
昔陵寢墳墓在會典著錄之內舊有圍牆應加修築者
照章修築其有著名古墓詳見方志不在會典著錄之
內應行防護者認真防護其有無名古墓歲久平漫或

遭水冲塌及忽然傾陷應行修造者立卽修造樹以石
碣志以古墓二字報明存案用皇覽塚墓志之例載入
縣志其有古昔陵墓基址高大四圍陂陀犁爲閒田者
應卽查明飭令退出案照律例永遠封禁並絕樵採其
有偷挖古墓穴取器物以致傾塌殘毀者一經查獲卽
照律例發塚條下增定新例嚴行治罪以上各節均請
查照向章稽察防護於各該境內所有古昔陵墓舊護
若干新修若干數目之處於年終結報督撫造冊轉報
禮部彙題奏

聞至歲修章程及委員巡查防護無虞之處於年終結

報督撫造冊轉報工部彙題奏

聞兩部各以年終片會互相查核以驗其有無疏漏聞
斷立彙存案孟子有言惻隱之心人皆有之仁之端也
一遵

列聖諭旨所示不得相沿積習視爲泛常儻所報不實
一經發覺定將該督撫及地方官分別議處庶不至如
前代帝王有保護古昔陵寢之飭諭而究無奉行之實
淮南新序所載文王澤及枯骨而九夷至於歸心古籍
相傳語非荒誕

仁政之流不遺一物臣不辭瑣屑覲縷進言伏乞

皇上聖鑒謹

奏

恭進儒臣撰集古金文成書有裨經訓疏

光緒二十一年

十一月二十五日

奏爲恭進

國朝儒臣撰集古金文成書有裨經訓堪備

御覽仰祈

聖鑒事竊

臣

籍隸山東有海豐縣人前內閣學士兼禮

部侍郎銜

臣

吳式芬道光朝進士平生專攻訓詁之學

長於音韻精於考訂所集攬古錄金文一書凡九冊爲

卷有三每卷又各分三冊其書本義專集成周以來鐘鼎彝器款識多據原器精搨及相傳舊摹本收入出前大學士臣阮元所著積古齋鐘鼎彝器款識前湖南巡撫

臣吳榮光所箸筠清館金文二書後尤爲賅備其書

體例則以各器自具之字定爲名數每一字爲一文由文一文二以迄文四百九十又七少者皆象形指事記曰干支之屬多者可敵真古文尙書百篇之一字各有釋釋各成文又閒附以各家之說雖所釋說互有短長要皆以根據禮典探討六書推闡經義爲主治今古文尙書者非得此無以爲同時佐證漢儒許慎說文敘云

郡國往往於山川得鼎彝其銘卽前代之古文是以許書所收自籀文及壁中經古文外所謂鼎彝古文者厥惟此種蓋自宋明以來諸家譜錄集摹古文之夥無逾於此者臣詳閱此書一稟

列朝

御製

欽定西清古鑑西清續鑑寧壽古鑑之旨爲流傳古文裨益經訓起見實無違悖字句堪備

乙覽今其子現河南開封府知府

臣

吳重熹刊刻成書

臣職在供奉既有所見不敢壅於上聞謹奉進初印本

十部恭呈

御覽伏乞

皇上聖鑒謹

奏奉

旨著留覽欽此

謝服闋來京補授國子監祭酒疏

光緒二十五年五月三十日

奏爲恭謝

天恩仰祈

聖鑒事本月二十九日內閣奉

硃筆王懿榮補授國子監祭酒欽此竊

臣

猥以淺學濫

廁清華去年服闋由籍來京仰蒙

召對仍值

內廷未報涓埃時深感悚茲復渥邀

寵眷俾得真補原官沛

恩波於臣朔長養

禁中比資地於孫卿遠睎稷下

九重簡在五內滋慙伏念六經根柢後世幾視若具文

三掌成均

小臣

已久於其事敢謂駕輕就熟自安櫟櫟

之散材方期立懦廉頑共勉文章以報

國所有

微臣

感激下忱謹繕摺叩謝

天恩伏乞

皇太后

皇上聖鑒謹

奏

請將已故祭酒宣付史館立傳疏

奏爲已故祭酒教思在人謹據呈代

奏懇請

宣付史館列入儒林傳恭摺仰祈

聖鑒事竊

臣

等據前在國子監南學肄業生翰林院編

修喻長霖余莖魏時鉅檢討洪汝源陳曾佑劉樹屏庶

吉士何聯恩內閣候補中書劉蓉第許文勲四品銜禮
部候補主事萬雲路兵部候補主事郭育才保升分省
知府刑部候補主事蕭文昭刑部候補主事郭書堂候
選知縣汪奎等呈稱前任國子監祭酒宗室盛昱於光
緒十年到任至光緒十五年因病

奏請開缺計在祭酒任內歷六年之久其教士以通經
致用爲本根柢程朱而益之以許鄭賈孔之學俾學者
精研義理以爲躬行實踐之資又仿朱儒安定胡氏分
經義治事之法俾學者各治一經一史及天文輿地兵
事農政等門日有課程編爲札記前祭酒詳加批閱辨

其得失孜孜訓迪終日無倦一時肄業生皆爭自磨勵
勉爲有體有用之學其有不守學規及疏曠功課門徑
歧出者則隨時懲戒斥逐立法嚴整爲從前所未有本
學筆帖式向無官課前祭酒以筆帖式各員官閒事少
暇日輒與講明清文譯理爲他日當官蒞事之資又創
立文字課區分等第給獎以資鼓勵因材施教士論翕
然本學書籍不敷講授前祭酒捐辦募置收藏大備並
籌欸生息酌增廩獎以資肄業生之誦習至今賴之又
復派員分門編輯本學則例條分縷析考覈詳明一時
屬僚賴其指授皆熟於公事明於掌故本學廟學全圖

舊本率多疏舛前祭酒以廟學全圖應纂入會典非詳
加釐訂不可乃選派通於算理兼工繪事者校補精詳
足稱善本本學石經刻逾百年當時蔣衡所書多據坊
本錯謬不免是以前大學士彭元瑞於乾隆間曾經
派纂石經考文提要一書進呈

御覽前祭酒於到官之日卽行奏請謹依石經考文提
要重爲修補旋奉

旨依議遂率學官蔡右年等敬謹考校一歸是正昭垂
千古安設柵欄兼資保護昔後魏崔光領國子監祭酒
修補三字石經前史侈爲盛舉前祭酒修補石經實與

崔光嬈美至於釐剔弊端體恤寒畯監應鄉試者考
到錄取後復謁見禮以防假冒之習而不取其贅貢監
錄科奏准憑同鄉官印結入場不必由本籍起文以省
往返川資之費皆足以宏栽培之誼廣造就之途今距
前祭酒蒞任已十有餘年六館諸生猶復恪奉前規遵
循弗替逆犯康有爲倡爲邪說之時本學肄業生皆篤
守師傳無一人爲其煽誘亦可見以道得民之效矣今
聞前祭酒已於光緒二十五年十二月間病故職等夙
承教澤感念不忘爲此公同呈請代

奏仰懇

天恩將已故國子監祭酒宗室盛昱生平事蹟宣付史館列入儒林傳以彰師範等因臣等竊維前祭酒臣宗室盛昱品端學邃識力過人生平著述撰有

國朝滿漢大臣沿革表卷帙繁重尙未脫稿選有八旗文鈔體例謹嚴搜羅甚富其在祭酒任內興學育才尤爲肄業者所推仰伏查新唐書儒學傳內之尹知章施士丐元史儒學傳內之吳師道周名榮陳旅皆以職膺冑教訓迪有方遂預儒林之選今盛昱事與前符旣足見國學師道之隆尤足昭天潢儒修之美可否將盛昱宣付史館列入儒林傳之處出自

逾格鴻慈所有據呈代奏緣由理合恭摺具請伏乞

皇太后

皇上聖鑒訓示謹

奏

王文敏公遺集卷第三

王文敏公遺集卷第四

福山王懿榮著

吳興劉承幹編

求闕文齋文存

重刻影鈔宋慶元本黃御史集記

懿榮

附案此集依影宋鈔慶元本付梓闕卷用明崇禎

本案宋目敘補板甫刻訖又續見瑞安黃編修紹箕新
得明正德刻本乃以三本合校並附刻正德本所存殘
文崇禎本補附詩正德本集後宋黃處權別錄崇禎本
集後明黃鳴喬等附錄各一卷於後影宋鈔本大題稱

莆陽黃御史集下注云權分上下秩正德本如之正德本行欵一依宋本其前序皆仿宋本元體字式入梓板心魚尾下稱莆陽黃御史集與大題同爲影宋鈔本所未及至目錄後記注等文與宋本同祇行欵稍有參差餘則諱字闕筆均未改削是覆刻無疑大題下黃公度誌後空行添入賜進士二十世孫希英銜名一行此是當時重刊人名書賈挖去冀充宋本痕迹未盡尙存一賜字後附宋黃處權別錄一卷崇禎本明黃鳴喬等所刻析爲八卷其凡例內論舊本處云登刻時各依所獲遞編而附名其後今因觀覽弗便改依諸體分彙云云

遂并宋本目錄後及集內原注某篇爲某人得於某處等文俱行削去以類分卷一失原本面目是崇禎本之妄也後有鳴喬等附錄一卷又附九世孫宋理學名儒補遺稿一篇謹案乾隆朝 欽定四庫全書總目提要據浙江汪啟淑家藏明崇禎本入錄題作十卷附錄一卷卽黃鳴喬等刻本十字乃八字傳刻之誤東家編略原本久佚非更別有十卷本也正德本黃希英跋稱此集初刻於宋熈熙三年丙申此是據楊萬里謝謬兩序而言今影宋本上秩賦內周以龍興賦於弟七行弟十八字宋寧宗諱擴字空注今上御名四字以後文內凡

遇擴字俱注御名或今上御名字以不貪爲寶賦於弟
十一行第六字光宗諱惇字空注太上御名四字正德
本皆如之下秩一同是影宋鈔所據本卽慶元二年洪
邁序稱邵州將鋟版郡齋遺信謁序之本邵州名沃之
所刻也瀘熙本自是楊萬里謝諤序稱永豐二曾所刻
較此尤前慶元二年丙辰上距瀘熙三年丙申已刻二
十年中更光宗紹熙五年若此爲瀘熙刻則不當於寧
宗諱預注云今上光宗諱且注云太上希英於正德間
所覆者實慶元刻避寧宗光宗諱字本與今影宋本同
出一原其跋則於二曾刻及沃刻未甚分晰止稱刻於

淳熙三年丙申者耳是此集自東家編略後一刻於淳熙丙申再刻於慶元丙辰證以各序灼然無疑影宋鈔慶元本上秋文賦內明皇迴駕經馬嵬坡題下奪賦字無關要義今仍之正德刻本俱依宋本而行氣稍狹又閒有譌字如上秋詩內寄題崔校書郊居一題居字正德本譌作舍壬癸歲書情詩投文值用兵句兵字正德本譌作水秋思一題正德本目錄及詩內題秋字俱譌作愁翁文堯員外擁冊禮之歸一題詩定須句須字正德本譌作淮通卷平字正德本俱譌作牙字此覆刻失處文內文柏述古廟之堂句古字正德本譌作故公孫

甲松罕不惑之目句惑字正德本譌作或下秩右書四
篇一行後篇尾校勘人名治字正德本譌作治影宋本
勝之然影宋本自此以下都殘失矣正德本於此下至
啟趙員外文後一行低二格別起一小圓圈下有文一
行云右啟三十一篇東家編略所錄下半葉尾前一行
文云裔孫迪功郎新泉州惠安縣主簿處權校勘祭南
海南平王文後一行有文云右祭文十篇東家編略所
錄下五行文云裔孫勅賜進士出身新擬信州永豐縣
尉汝猷校勘如前式莆山靈巖寺碑銘後一行有文云
右碑銘四篇東家編略所錄大唐福州報恩定光多寶

塔記文銘詞後一行有文云右五篇裔孫處材錄之石
本如前式凡此皆與本書前目錄下所記注文合與影
宋本目錄下記注文亦合又與影宋本上秩及下秩存
處文後記注均相類又三行下大字頂格居中識云莆
陽黃御史集終下半葉第三行文云裔孫勅賜同進士
出身鉞校勘此皆宋本原式又通卷文內銘詞俱跳行
排寫如影宋本上秩文行款一同惟正德本來時全集
板已刻就下秩自影宋本殘失處已據崇禎本案目敘
補行款不能改從使歸一致謹識於此爲可惜也正德
本賦內於每段限韻字作一大圓圈圍之崇禎本同又

於賦中每段起處界一小圓圈識之影宋本俱無之此
後人評讀標識處或宋本原無抑或宋本舊有而影宋
鈔本去之均未可知既未更從無須置論至以崇禎本
與影宋本比較崇禎本多奪字又間有臆改處如詩內
滔自注凡滔自稱名處皆改作公字之類最謬今既以
影宋本爲宗此亦不復縷記下秩據崇禎本補足後

大人又命以續得之正德本較補影宋本正德本徐正
字名皆作夤崇禎本作寅今各從其舊正德本下秩於
寧宗諱字仍注今上御名於光宗諱字仍注太上御名
字與上秩同驚徵貞讓朗等字仍闕末筆今不復據改

又開有訛字崇禎本啟南海韋尙書文或能句下注有
闕文今仍之藉以句正德本藉作伏今據改啟刑部鄭
郎中文非敢切平生之志業句崇禎本奪非字今據正
德本補竟遲迴於書幕句正德本幕譌作暮字謝試官
文內莫遺鉛鐵句正德本莫字下旁注空字啟楊狀頭
文內虔戴遭逢句正德本戴譌作載字舉步而卽昇雲
漢句正德本卽譌作則字代鄭郎中上靜恭盧相文終
有負於神明句終字上正德本多一則字似衍啟沈侍
御文孰不傾矚句正德本多下情無任四字下仍似有
闕文崇禎本并此四字去之今據補入祭陳侍御嶠文

內吾肯斯仿句仿字正德本譌作傲一百年莆邑大數
句正德本大譌作之注內崇禎本曠八十七年正德本
作曠百年林端公三字下崇禎本作同字正德本譌作
曰字祭先外舅文起行正德本多惟靈二字崇禎本無
之今未據補楊柳霜多句正德本柳作桺別字祭崔補
闕文內皇天不祐句正德本皇天二字下旁注空字祭
右省李常侍文內時稱最怒句下注文八字正德本無
之是後人添注容與松江之歲月句歲字崇禎本譌作
風丘隴權儀句儀字崇禎本譌作宜今據正德本改祭
司勳孫郎中文內早干輦轂句干字正德本譌作於祭

宋員外文內至於行路句正德本作路行二字倒置又
碑銘泉州開元寺佛殿記文內情車業網句正德本車
譌作軍矧開元三字下崇禎本空一字正德本旁注句
絕二字今據補入靈山塑北方毗沙門天王碑文內如
是則護南瞻部洲句如是二字正德本作夫如無是字
銘詞中雁塞煙塵句正德本作塞雁二字倒置文六金
身碑文內以無爲爲志之也以有爲爲志之也句二也
字崇禎本作者字今據正德本改注文我公至清源未
仕時正德本仕譌作在安農楊公承修句正德本修作
休道非常道句與賓席將校句十二字正德本夾行接

寫與注混莆山靈巖寺碑銘文內做公了公及句崇禎
本及字譌作乃下空一格正德本旁注句字今據收補
又夾注宣宗元年二行懿宗元年二行正德本無之是
後人添注東歸之尋舊址正德本址作止龜泮靈感禪
院東塔和尚碑文內山產菜號苦蓋又還取苦蓋之卯
句正德本蓋作益武宗皇帝乙丑之否句下棄之正德
本棄譌作稟慧非重瞳句正德本慧作患今據改注文
是時公尙未登甲科字是後人注華嚴寺開山始祖碑
銘文內夾注五處正德本無之是後人添注司直陳公
墓志銘文內而二子西去句去字正德本譌作笑福州

雪峰山故真覺大師碑銘文內於府之東西句西字崇
禎本譌作南今據正德本改崇禎本凡例內稱文苑英
華錄詩文十一篇間有詩同題異者有字句異者今祇
於題下字句下注文苑作某題某句某字耳今崇禎本
詩內書崔少府居題下注文苑作贈李補闕送友人遊
邊詩末二句下注文苑作薊門雖漢土游子莫從容送
陳樵下第東歸詩風爽徹城泉句泉字下注類苑作蓮
送友人邊遊詩親詠關山月句親字下注文苑作新歸
吟鬢的霜句的字下注文苑作白斷酒詩免遭拽盞郎
君諱句諱字下注文苑作謔寄獻梓潼山侍郎詩簪笏

落民間句民字下注文苑作人河南府試秋夕聞新雁

詩薊北乍驚秋句乍字下注文苑作又又稱或詩文中

有字句較勘未妥者則旁注疑字今崇禎本詩內貽李

山人詩末注云兩兩字疑錯題山居逸人詩末注云兩

秋字疑錯鄜時李相公詩內綵毫雖乏敢無言句雖字

下注疑作錐至崇禎本賦內御試良弓獻問賦末注云

查洪邁容齋四筆謂此賦有五聲後闕一入聲文內穎

川陳先生集序內與同郡三字下注指泉州天復元年

句下注辛酉二字文末小注唐天復元年曹松王希羽

劉象柯崇鄭希顏同登第年皆七十號五老榜影宋本

正德本無之是後人添注點竄前人本集原文字句古今選家通病率不足據又其所注疑錯等字處影宋本正德本皆如字無別本可證與上秩賦內文內後人注語今概不竄入致失舊本真面祇附記於此又嘉慶中福建福鼎王遐春麟後山房刻南越先賢集本內黃御史集所據卽明崇禎黃鵬喬等刻本無足稱引惟王學貞書後有云據唐人試帖所載引第四卷省試內出白鹿宣示百官及省試奉詔漲曲江池云曲江池一本無省試字且云詔字當是試字之誤試帖據唐制登進士後又有試名奉試前崔曙荆冬倩皆有奉試題是也且

此試不用題韻似特試者况省試二字亦決有誤以此
題乾符二年在僖宗朝而前內出白鹿題注乾寧二年
在昭宗朝則自乾符至乾寧約二十餘年未有乾符既
中省試而復赴乾寧省試者也此必有一試係制試或
奉試而題誤作省字耳此說甚核原書中未之正耳云
云今特錄之以補校勘之所未及十月二十日校畢懿
榮謹記

齊魯古印攬序

春秋左氏傳國語言璽書周禮韓非亦言之應劭衛宏
說秦以前民皆以金玉爲印惟其所好尊卑共之是也

六書大旨至史籀已失秦漢印篆又別出一體然自李斯未畫一之前周末文字各國異形殊軌分塗不强同也蓋六書之旨益微矣其孳乳繁變莫可究詰遂無從鑿識存於今者若石鼓及諸小印璽是已璽之具官名者是周秦之際如司徒司馬司工司成之屬半皆周官又司祿一官今周禮下注闕而璽印中有之其上二字亦絕不可識真漢人所謂奇字矣人名者漸近小篆有秦漢之際者今日而欲以朝代識別之亦止若是耳難稿屬也至當時璽印所施識大識小各隨事爲用亦不可概定雖縣高南鄭世丈篤志好古黽勉以求所得古

印多出齊魯以古印璽之官名者冠於前人名者次之不強別其爲某周某秦某爲秦漢之際者各以類從而以秦漢官私印附焉名之曰古印攬其識卓矣庚辰夏榮備員詞臣越次年省墓歸里過濰晉謁獲觀所藏金石傾心論古歡若平生出其印集見示屬余爲之記其升古璽印於秦漢印前者爲從來譜錄家所未及此非深通古文者能如是乎吾服南丈之卓識矣光緒辛巳三月

海豐吳閣部道光乙未會試硃墨卷題詞

此道光乙未科會試海豐吳閣學公硃墨卷也故事春

官積每科試卷屆數十年一銷燬焉公之文孫岫字虞年以同治乙丑第二人捷南宮觀政儀部及庚午歲春官卷循例銷至道光丙申虞年於灰燼中檢得公卷捧歸裝池藏之時公房考溫公又適爲禮部侍郎吳氏與寒族世爲婣好溯公捷後咸豐辛亥長公試任子高等入官次公同治壬戌辛酉並科鄉舉虞年先舉咸豐辛酉京兆試爲叔侄同科榮屬在戚末獲觀敬志非僅羨三世科第爲佳話抑亦見虞年孝思不匱爲不可及也
辛未十月朔日

跋灘縣陳晉卿先生桑梓之遺書畫冊目錄

附陳

先生原跋

此舉書畫並收凡字之大軸長卷者俱裁爲褰衣裝統歸爲巨冊甚可惜也創自膠州高南阜手後歸卽墨郭根庵已八十冊矣然漸收及外省人名曰附見實亦自亂其例此居鄉旣久或無所得乃取以自遣無聊之極思耳後質萊陽典當舖中中間失去數冊又後遂歸陳小蘭推廣其例又以書畫之爲吾東先輩上欸者及他省名流之曾履吾東者亦附見焉開此二門然較根庵之用意稍密卽後來收者亦多居上近聞已二百冊人

境廬記

余所輯海岱人文則不爲此推廣二門以文須肖題也
若桑梓之遺四字名旣籠統卽此二門是亦未嘗非桑
梓之所遺者猶可說也

南阜初意止集膠人根庵乃漸推廣之此冊爲鄉里所
豔稱久矣丙戌七月詣郡謝弔從戚鄒張允勳騎尉處
假得此目讀之殊有楓落吳江之意南阜根庵兩先生
當年率意集此無一宋元名蹟可爲壓卷之品晉卿丈
後來居上或當稍勝然其近日簿錄吾未之見也懿榮
記

南阜根庵此輯意趣大佳惟挂漏太甚當於各郡名人

錄目懸俟之將來按圖索駿亦不得以燕石充數然此事亦自有機緣湊拍不能盡委爲寒士力薄也

卽墨郭桓庵先生續南阜老人輯桑梓之遺卷帙浩繁舊存萊陽質庫道光間爲族叔季則先生所得先生曾手撮一目且欲考其人物別作小傳以謝世弗果己未春冊歸余家並於萊陽訪獲末冊校點前後已非全璧因念是冊爲海岱名蹟又經南阜桓庵兩先生審定片紙隻字文獻攸關不詳爲著錄再傳百數十年或致散佚姓氏無徵矣故於出處欸識反覆考訂首標姓氏爵里安頓前後

各題跋次之其尺寸大小及葉數種數多少間爲
錄出欲使覽者不待傾箱倒篋而法繪寶墨與夫
審定之精妙裝池之古雅如在目前則區區編次
之苦心爲不虛費耳咸豐九年十二月二十五日
後學陳介錫敬題於文石山房之雪窗

寧海王棣軒

明夢

辦香齋詩鈔敘

道光閒寧海宮明經卜萬集其鄉先輩遺詩爲牟平遺
香集十八卷所錄國朝以來寧海詩人詩凡七十三
家噫其盛矣嘗謂一人之詩一身之史亦一朝一時之
史也無論其生平記述耳目踪跡所歷上而朝章國典

世運升降時事變遷之大下至一身一家一鄉一邑離
合悲懼山川風物之殊莫不委曲詳盡自道其實卽微
而至於心地性天忠厚慘刻舉念屬意之細人所不及
知己所不能言亦莫不發洩吐露於有心無心之際而
學問淺深詣力高下之故其後焉記云聲音之動由人
心生也是故讀一人之詩必舉其全集一集之成必貴
乎其人之生時所自爲勘定合一時數十百家之全集
仕宦隱逸求其踪跡所親到耳目所親知以推測其一
朝一代一鄉一邑世運時事之真則不獨爲其一身之
史且可有裨其一朝一時之史詩之有關於世道如此

此孟子當時所以有春秋後作之感也夫吾宗寧海棣
軒太守比年來京師手定其詩成辦香齋集若干卷出
以見示自言皆其平生耳目踪跡所親歷者一一筆之
於此賦陳其事而直言之蓋深得古詩人之惜嗚呼此
不獨爲其一人一身之史中間宦遊所至出入京國周
流大江南北俯仰流連比事屬辭觸物興懷使後之人
求之將有裨於一朝一時之史也寧海南接崑崙北枕
渤海羣山萬壑吐納其中道家相傳爲仙靈窟宅昔人
謂山水鍾韻士宮明經自敘其所選集備言之今崛起
於七十三家之後者固當以我棣軒此集爲稱首矣是

爲敘光緒乙未十二月

登州古器物拓本跋

出門半里見崎嶇周匝纍纍相望儼然城垣俗呼爲古城壻卽古牟子國城也父老云此數十里中往往春耕鋤土多出古彝器刀幣鏡劍之屬十餘年來就余聞知有獲齊刀漢半兩五銖貨泉等事者動輒數百柄及百十千貫不等余性耽金石與日俱深鄉人北上率以餉余雖皆易得之品是育黎古文也遂輯往歲所收藏並得諸他邑之隸吾郡者彙爲一冊續之又續將無已焉書曰惟厥土物心臧此之謂也況世事日非三代古道

猶在吾鄉望古遙集之餘能不奉若家珍哉己巳正月
下浣古現村人

洛社耆英會圖卷跋

此卷舊藏山西夏縣涑水書院有明及國朝諸公題
識累累流傳有緒去年秋西賈販來京師輾轉歸今樵
野尙書絹素彫敝尙書重付裝池懿榮因得寓目此圖
爲當時妙覺寺禪本無疑畫爲閩人鄭與序約則溫公
所手書也以明人集帖所傳刻公手劖字跡斟酌之氣味
正復相合吾鄉益都孫退谷侍郎庚子消夏記所錄宋
耆英會圖退谷跋中有諸老龐眉皓首坐臥長林豐草

之間致足樂也數語當是後人傳誦盛事裝點風景別爲一類與此無涉惟其跋中引羅廬陵云元豐間洛陽諸老爲耆英會圖形賦詩一時誇爲盛事而識者悲之曰此皆仁宗所養之君子而皆老矣升沈消長之會過者甚可畏也時林行已曰天將祚其國必祚其國之君子視其君子之眾多如林則知其國之盛視其君子之落落如晨星則知其國之衰視其君子之康寧福澤如山如海則知爲太平之象視其君子摧折頓挫如湍舟如霜木則知其爲衰亂之時又曰天將使建中爲崇寧則不使范忠宣復相於初元天將使宣和爲靖康則不

使劉陳二忠肅愍遺於數載時以爲至論又其跋蘇文忠書溫公碑云王廷直修復公墓在金皇統八年戊辰乃宋高宗紹興之十八年也距紹聖仆碑時共五十有五年時公墓已淪在異域而其臣愛護脩復之如此其視紹聖崇寧爲何如也金主卜相乃繪溫公之像賜之正中國指爲黨魁時事也吁可哀哉侍郎能持斯論魯論所謂君子不以人廢言光緒二十四年夏四月浴佛日

誥封宜人元配蓬萊黃宜人行狀

宜人黃氏行二山東登州府蓬萊縣人道光二十一年

歲在辛丑六月三十日未時生於直隸順德府邢臺縣
典史官署時父盧龍君方爲邢臺縣典史也名之曰蘭
曾祖父巖乾隆五十二年丁未科進士廣西平南縣知
縣祖璿光附貢生江西南城縣縣丞署南城縣知縣父
宗敬直隸盧龍縣知縣二品封典近年八十有六歲母
王夫人乾隆乙卯舉人江西知縣王榮發女同縣人享
年六十有四生子一昭鑑直隸候補知府女二長適蓬
萊王氏次卽宜人宜人生長任所未出 畿輔七歲時
隨母回蓬萊住城內上馬台舊宅時 先祖妣于太夫
人在籍里居閭戚鄰稱誦宜人姿稟端淑性情柔順倩

媒提王夫人以書寄保定南城公謂盧龍君曰吾郡大
姓惟福山王氏德最厚故其世澤亦最長子孫蕃昌科
第綿延中丞公第五子尤孝友惇篤其後必大可許之
也此 先祖考榮祿公撫山西之期年孝友惇篤謂

先考資政公也

懿榮

才三歲耳以在諸孫中最爲

先

祖妣所鍾愛故擇配必親相之宜人生平啗於言辭長
於針黹同治元年壬戌盧龍君方需次保定 先公以

兵部主事咸豐庚申奉

旨回籍團練勦辦豫匪差竣

回京攜

懿榮

北上就順天秋試卽以其年五月三日就

姻於保定甥館時

先伯父文安公

諱丙塋直隸文安縣知縣伯母

孔恭人亦在保定親視成禮二年癸亥山東撤防北路

平定家母謝夫人攜弟妹輩入都隨先公任京曹

十月宜人因生一女於保定後四歲殤懿榮先來京師

三年甲子懿榮以外舅盧龍君在任邱縣任內捐辦天

津海防軍火部議給獎准移獎親族子弟懿榮得敘以

主事用籤掣戶部六月到官宜人先於二月攜長女來

京登堂拜見晨昏定省隨奴婢操作尤知軫惜物力一

絲一粟無所廢棄深得翁姑懽心寒家自先十世

祖太常公以下累世久官於外素無田產先祖榮祿

公謝世後家道中落所居城西村曰古縣地當孔道七

遭兵燹至是廬舍衣物焚掠一空先公官兵部十餘

年又連遭先伯父長安公

諱伯潤陝西長安縣知縣

次伯父文安

公喪

先祖榮祿公柩自伊犁入關行至陝西爲粵匪

回匪先後相閑阻浮厝於蒲城縣傳馬村者且廿年四

年乙丑

先公以知府候選始得乞假措資迎取先

靈六柩一時回籍安葬此廿年中閑曹清苦甚於寒素

米鹽鱗雜皆賴

家母籌畫勤儉一力支持及宜人來

歸尤能左右奉養親小姑如姊妹舉家怡怡幾不知有

窮官之苦季弟懿棨時亦授室妯娌和睦人無閒言五

年丙寅十月生次女於京邸長巷上頭條胡同今歸海

豐吳氏子苾閣學三孫河南陳州府知府重熹次子監生吳崐是年三月母王夫人疾終京寓兄昭鑑時官刑部郎中宜人遭母喪哀毀骨立及九月保定所生長女又以痘殤心緒益劣至十月分娩後下血太多病幾不支七年戊辰十二月長子崇燕生今聘直隸豐潤戶科給事中張人駿女九年庚午七月次子崇烈生以堂上命爲仲弟後今聘直隸南皮署湖北督糧道張之淵女於是懿榮之官閑曹亦將十年性本不善綜覈又素無人事於外仰事俯畜經營籌畫得宜人之助爲多其母家外官雖較吾家一時稍裕然從未向家中書稱貸

一字其訓飭子女於所嬉戲玩物雖瑣屑不使毀棄暴殄內室所蓄書畫碑帖墨本等物盛夏時必手自抖晒防蠹鼠極力歲以爲常兒女雖幼穉無知識於文物戒不敢近也

懿榮

居京師久交遊旣廣每以春秋佳日與

長沙周閣學吳縣潘侍郎遵義景閣學洪洞董研樵檢討太谷溫味秋儀徵陳六舟巴陵謝麐伯餘姚朱肯夫南皮張香濤吳縣吳清卿六編修會稽李莼客甘泉秦誼庭績谿胡荻甫光山胡石查遂谿陳逸山五戶部大興劉子重儀徵陳研香鄒縣董鳳樵三刑部元和顧緝廷工部歙縣鮑子年長洲許鶴巢兩舍人遞爲詩酒之

會壺觴幾無虛日宜人檢點肴核迎時先辦客至無缺
有拔釵沽酒之風懿榮又好聚舊槩本書古彝器碑版

圖畫之屬散晷後必閱市時有所見歸相對語宜人則
曰明珠白璧異日有力時皆可立致之惟此種物事往
往如曇花一現撒手便去移時不可復得後來縱或有
奇遇未必卽此類中之此種也好極力從臾購之以爲
快以故裘葛釵釧往來質庫有如厨笥忽於辛未年冬
得乳巖之疾爲庸醫所誤創血涔涔下日數斗凡三年
體氣大虧壬申五月先公選授四川龍安府知府攜
家之任長子崇燕襁褓時卽爲大父母所鞠育並隨以

去宜人送 翁姑出門登車牽袂涕泣至不能仰視自
言兒病體如此不能隨侍恐此後兒便無福再見矣

二老聞之惻然慰以加意調攝年少人不難復元也然

是語已爲之讖矣次年癸酉秋 懿榮 中順天副榜第一

九月宜人斗患傷寒又誤於醫藥有江西縣丞丁君者

醫學甚深景劍泉閣學薦來使救之雖就瘡而羸弱益

甚十三年甲戌秋八月 懿榮 大病瘧三閱月未已宜人

力疾奉湯藥恆日夜不寐夜靜時輒焚香籲祝又素不

知醫幸銅梁王孝禹番禺張延秋兩工部及胡石查戶

部浼雲南倪翰卿太守診之始瘡而宜人心力日瘁益

憊不支至光緒元二之間每秋冬必大嘔血百計不能

止病遂大劇先公邊缺清苦累載不遷不能屢給京

師懿榮

東北閣至此凡七次報罷宜人傷之甚每於重

陽放榜日夜半聞街衢有唱賣題名錄聲者輒以被蒙

頭曰此聲淒涼與秋風並厲不可聞也延塾師課幼子

雖於病亟時稍醒必喚取所具館饌目治之而後進又

性喜奉佛持觀音經咒無事時動念念不休

懿榮多聚

南北朝古石佛像時已二十餘區大小累累皆龕置臥

內親串至爭咤以爲奇見輒斂手去或勸以移置別室

勿瀆喪有罪宜人笑應之曰是不知佛法也亦以朝夕

瞻拜爲樂又善瓊蠟法凡

懿榮

所購彝器泉印鏡劍磚

瓦等物每得一種必手自椎拓務使紙白如玉墨光如漆無絲毫墨瀋沁入字口中乃已押小印一志其物名文字燦然或拓一造象必再拜視之曰心心相印此便作億萬化身云云是其佞矣紙尾綴小橫方印一文曰王懿榮婦黃氏一心供養蓋仿造篆文中語也又善繡篆及八分書字能知其筆趣所在三年丁丑病益篤時兄昭鑑任北河南岸同知駐固安遣家屬來視之春夏相繼且爲之料理衣衾至八月大劇嗽不止吐若沫方書曰白血自知不起召子女語之曰我死後爾父一人

隻身在此此去川署又六七千里近年河陝大飢路不
靜爾輩可就近先往依爾舅父母常住時須善爲人女
每日自梳裹男每日自誦習一切飲食言語向人聽從
勿令人厭以待明春爾大父母必遣人取爾輩至川署
庶爾時吾魂魄可稍適也其丁寧囑咐絮絮喃喃若將
遠行者又向

懿榮

慟哭曰人生必有死顧吾勿他念惟

老父年將八旬在山東 翁姑遠在川西吾向者送別
時俱言及兒多病恐此後無福再見乃一時情極之語
不覺自出諸口旋悔之懼傷親心乃今果然矣卽以月
之四日辰時病沒宣武門內兵部窪中街寓所時年三

上有七歲也病凡七年甚病者三年然至死神明不亂
歿之先一夕語家人曰適稍假寐見一少年婦人甚豔
麗手執一仕女冠來召我我許以明日辰刻必至殆將
以此時逝矣及卒果如其言計宜人一生託身閭閻兩
姓皆累世仕宦吾家適中厄自入吾門食貧力賤無異
寡人子然不知有愁而安之若素積十五年如一日也
自歿後之二年懿榮乃舉順天鄉試旋成進士入館選
先公調大郡兩子九經皆成誦不出三年宜人都未
之見其數奇如此唐元相詩云誠知此恨人人有貧賤
夫妻百事哀此之謂矣傷哉懿榮狀

說郛鐘

郛是莒字幾是共字春秋左氏傳僖公二十六年杜氏注莒夷無諡各以號爲稱又釋例自茲輿十一世而茲丕始見于春秋共公庚輿而下微不復見後四世而楚滅之是莒之有諡自庚輿諡共始此幾字上作半下從艸是共字無疑餘羨文也與阮氏積古齋款識所著邾公二鐘黹字並同鼓右云共公之孫鼓左云其縣四堵又云我以享孝樂我先祖案此當是莒公孫以武事作鐘祀于共公廟者故得用四堵也大鐘旣三字下是卽字

說匱侯鼎

案匱侯下一字不可識自是作器者名彝器內人名往往不可識此與南海吳氏筠清館金文所著周占卣是一人所作釋占字亦未諦當諸侯不生名之說自是春秋經例微義漢儒所存舊說若列侯作器於其祖廟無妨自名也亦款識常例

說伯懣卣

海豐吳氏所藏鬯敦第一字作𣎵南海吳氏筠清館款識釋作鬯與此相同又彝器文有作用孝享于宗室者有云作乃宗寶尊彝者此作乃室

說齊子中姜鉶

此鑄與宋宣和博古圖薛尚功欵識嘯堂集古錄所同著錄之齊侯鑄鐘當是一時異事之器故文字率相同字在兩銑及鉦中并鼓左右閒自左銑起連鼓左兩行讀下四行再起至鉦閒四行下接鼓右前四行起向右銑下連鼓右兩行讀始竟左銑至鼓第一行齊字下二字俱泐上一字左畔作形似辟字下一字不可識第二行子字下一字泐是作器人名永命下三字土繡甚堅第四五六七行云皇祖聖叔皇祀聖姜皇祖又成惠叔皇祀又成惠姜皇考適中中字已起在鉦閒皇母云

云竊意適中當是成惠叔所出嗣于聖叔者上旣著某
爲口叔之孫此并述其所自出者故于皇祖皇祚下加
一又字別之或釋爲父于祖下則通于祚下似不辭也
慮虞借字隄重文齊侯鐘鐘誤摹作𣎵又失去重文藉
此證之舊釋綴亦非子住字下叔字上一字與左銑𣎵
口叔之孫叔上一字同泐不可識自齊邦二字下侯氏
錫之邑二百下連鼓右前四行讀爲侯氏當日錫口叔
勞之邑事與數𣎵字下一字微泐作𣎵文不完自是地
名無從鑿識造卽告字從告以下至媮改止是述侯氏
錫邑之命與辭某卽業字𣎵皇邁說文遠行也釋詁毛

詩傳箋廣韻俱云遠也古器銘邁萬二字通假此當訓邁望說文古文至訓鳥飛從高下至地也邁至猶無遠弗屆意至下一字泐第五行改下子上一字泐自此起而之右銑兩行下及鼓右後二行讀子字下右銑第一行首一字泐是作器人名余下一字微泐不可識誤下一字亦泐細審是大字同治庚午四月山西榮河縣后土祠旁河岸圯出土爲彝器欵識箸錄以來自宋及今

第二罇

說鉞

古方足幣圖幣有文作釗字者舊識爲金化二字非也

榮案此鉞字說文斤部鉞下云劑也

小徐本

从斤金聲又

劑字刀部劑下云齊也从刀齊聲鉞劑字同義竊意鉞
卽劑字鉞劑轉注字如權衡等字有轉注意同周禮地
官司市以質劑結信而止訟又質人大市以質小市以
劑先鄭司農曰質劑月平賈後鄭司農曰大市用長券
小市用短券是質劑二物之明證劑鉞轉注字不得專
訓爲翦齊意司市之劑質人之劑皆爲鉞字無疑今方
足幣率如翦形文作鉞字者是也後鄭司農訓質長劑
短二義甚古惟券字義同而實未協以當時不見質劑
二物乃訓爲券也質古方足長幣連足幣文作𠄎字者

是此二等幣制作較釧文者倍長不止與後鄭訓長意
適合是釧卅等幣爲地官所稱質劑二物自來無人道
及者周平安君鼎文有釧至字是釧自有劑平意劑釧
之轉注又一左證古彝器刀幣銅質迥異後世器俗稱
對銅卽五色釧金也鼎文釧至卽此義幣文釧上有一
二字者紀數也李氏古泉匯所著秦權泉文曰第幾重
四兩以秦半兩大錢八權之合遂定爲秦權泉說甚確
則方足幣之卣及耒及二釧卽以劑安邑隶邑等小幣
爲司市質人之用明甚今由安邑等釧得周官之所謂
劑用以知劑爲釧轉注字又因釧卅等卅得周官之所

謂質兼以明後鄭長短訓之爲古義釋名由選泉而得
深自幸也懿榮

古泉說

各說均從歙縣鮑氏觀古閣十種中錄出崇煥
謹記

蜀漢直百五銖 直百字實兼隸體疑初議改鑄時卽
取五銖舊泉爲模增入直百二字當時盛行隸書遂承
用之

釋六字刀帛字 京不得濫稱此字確非京梁齊安得
擬周卽其僭稱亦不見經傳鄭之京城乃地名非通稱

也崇煥謹案此三代古刀幣歷來釋爲齊梁物齊梁諸侯國故不能僭稱京以自比天王又孫春山文汝梅胡石查丈義贊均釋此字爲京字故文內云云并見鮑氏書

釋齊三字刀背文 齊刀背文○非日乃易字之省○又○之省万非万亦易之省万乃並易之省正非正乃匣之省屯个乚並安之省以背文本有安字易字兩種也𠂔乃六字刀面文𠂔之省至又𠂔之或體𠂔非之乃𠂔之省中乃𠂔之省𠂔乃六字刀面文𠂔之省大非大○非口並面文𠂔之省節墨乃背文大𠂔大亦非大仍𠂔之省

釋明刀字 明字刀一變而存其環爲泉此圖泉○

之所從出其稍大作𠄎𠄎者𠄎非四字仍著刀柄之斜
直文存其舊以志其爲明刀之遺若𠄎𠄎二字則直言
其爲明刀之變仍書其文曰明刀言以此一泉抵一刀
至再小而爲一𠄎則並省去明刀舊文直言以一小泉
抵一刀耳明刀止列國至列國之末乃秦初則變而爲
𠄎𠄎𠄎𠄎成圓以故率與秦漢半兩同時出土先秦泉
不皆官鑄每沿用舊泉之文榮所獲榆莢半兩泉中有
極小𠄎𠄎泉亦是一證故𠄎字釋月固非釋化亦無當
得此說庶合𠄎𠄎𠄎𠄎一𠄎而兼通之矣

釋陳壽卿五銖銅范背文建武十七年 漢人隸書七

皆作七似十字而下微_レ向右上出小尖孔廟百石卒史碑雖大字尙如是其尖鉤甚微今有拓本可證銅器字小而淺其下鉤易繡滿或范本未足且經多年始出土遂竟作十七故凡作十七者不一又有作二十者證之本年皆爲七字此范釋作十七與十六年之說正合

崇煥謹案李竹朋先生泉匯釋作十六年案本紀十六年始行五銖之說是十七年明甚

釋空首布松字 古人文字增減挪移上下左右惟便

所適

崇煥謹案今世所見有船部欲悉諸文之異

跋北宋刻本百緣經卷第四涇字冊梵夾本子

北宋殘本撰集百緣經第四卷光緒十五年正月二十

七日懿榮爲再同前輩題此得覩北宋印本經卷歡喜
讀歎受持奉行

題初拓精本魏劉懿墓志

銅梁王孝禹
觀察瑾藏

此本第一行史字尙未盡泐自是最初搨本

懿榮
曾得

一本後半未完以紙短未足淡墨迅掃是試搨本與此
無異近且有覆刻本不止一石然皆從史字已泐本作
僞者無足深辨嘗謂南北朝諸誌石當爲古今楷書之
祖孝玉世丈以此本屬題光緒庚子五月懿榮附記
跋宋牟平宰張益之等題名刻石

附題名原文

宰張益之丞張伯起尉李復同觀日出海市於

此大觀四年六月初五日

左讀

後六百六十六年光緒乙未夏六月鹿山宰序班攜同書賈孫二酉訪得此刻於康公墓東石崖下捫蘿剔蘚煙煤粗紙遂爲此石古今天壤間第一搨墨是刻石時之朶山正屬牟平縣地得宰及丞尉名可補今志內宋職官之闕在今縣境內爲有宋第四石刻時海氛旣靖懿榮奉 召北上請假省侍在籍讀所記觀日出海市諸勝境不覺有裹糧蠟屐之思此心怦怦然動也并蓋所摹福建閩縣陳氏舊藏漢育黎右尉印文記之皆吾鄉邦一時掌故也懿榮附記

南北朝存石目敘例

是編最錄南北朝刻石至今存者凡

事列

目有四曰碑曰志曰記曰梵典皆據墨本審定標題分

并排類金識磚字不與焉石亡文存

前人著錄原石久佚或收藏家舊拓

孤本如王子晉碑許長史舊館壇碑蕭敷敬太妃雙志及出土後傳拓無多復瘞原所如張黑女志之屬重

摹偽作

如舊刻弔比干文及道光以後正定拓工李寶台偽造諸刻長安帖賈所鬻剗改增損小墓志

之屬胥從聚落所在之地箸之令仿古者有考也蕭梁禁

碑傳世絕眇宋齊近古諛墓未聞拓跋之興舉世崇信

釋氏爭有造像以求福利讀其文字雜出不倫或記姓

名爲邑子化主靡可殫究今綜書之曰記聚以類也其

竺乾之祕語密字入中土後譯自緇素復大書深刻偶
之爲經幾如鴻都之石所未安也爰別箸爲梵典惟是
冢墓志版小或盈尺可乘可負造象多散於荒村野寺
好事者往往移置冢山供養率轉徙無定然著其可指
數者餘則闕之以俟搜補書成名之曰南北朝存石目
蓋有存者光緒七年太歲辛巳孟陬之月福山王懿榮
記

目一

宋碑記

目二

齊記

目三

梁碑志記

目四

陳碑記

目五

魏西魏東魏碑志記梵典

目六

齊碑志記梵典

目七

周碑志記梵典

目八

隋碑志記梵典

寫本既具每方虛左有續獲者當據以補錄其文字磨滅紙墨敝闇前所辨識或有謬誤續見精本當據以校正溫故知新無已時矣始自壬戌迄今辛巳前後十九年中探索借讀往返商榷者爲膠州匡鶴泉師吳縣潘鄭龕師江陰繆炎之師濰縣陳壽卿丈諸城尹慈經秀才會稽趙搗叔大令吳縣吳清卿太僕光山胡石查戶部考訂違合剔抉幽隱則大興孫問義兵部銅梁王孝

禹工部永明周暨季編修會稽章碩卿大令之力爲多
利津李竹朋丈大興劉子重刑部績溪胡甘伯戶部諸
城家戟門刑部叔氏亦嘗有事於此今墓木已拱竟不
及見此刻之成也悲夫懿榮附記

一分錄例 各朝刻石分碑志記梵典爲四門據拓

本案年月日敘次錄入無年月者案類朝代殘字

殘字類時事類官秩類主類維那類法義類命過

類比邑師類邑子類州郡類氏族類比邑類比邑僧

佛弟子類弟類沙門類沙彌類僧類尼類比丘弟子類

信類清信女佛弟子類清信士佛弟子類清信士類清

女類人等類人眾類男女類人等類某爲某類清信士
某造類婆名類娘名類共造類某造類僧道名造
類俗名造類題記類題名類先世家屬題名類爲

字類原字類殘字類凡無年月者審厥字體定其
朝代分屬各門又各以類從不著子目以省繁重
類未備者蓄以待之有出此類外者續附後以所
以補之暗寓此例隨得隨入庶無害手
出之地及字蹟定之分隸各朝大興翁氏所謂以
文字定時代也多見自識其不著年月而有時事
可證朝代者以時附之碑之有額志之有蓋者悉
就額蓋原題名之原題義有未盡及應著爲某某
人名者據碑文以小字旁注足之至原題年月人
名曾見箸錄其字舊有而今殘闕者以小字旁注
補之書撰人名原石敘在文內未明署銜名列前
後者以小字旁注別之其無額無蓋及造象摩崖

各石必詳據原石所箸事實名之舊出者不依前人著錄稱名爲名新出者亦不以襲俗名爲名務從其朔造象巨石正面作大佛象以背面及兩旁刻字文辭繁富者字數較多易與碑混皆入記類摩崖記事文不稱碑者亦入之因此皆非碑屬也
不得循前人之誤概以碑名之所以求是

一不錄例 前人箸錄及地志所載石亡文存者不錄銅象及涂金小銅碑雜器款識凡屬金文者不錄原石久佚前代重刻及近人以所藏舊拓孤本覆刻者不錄原石見存而各省帖估輾轉翻刻以

售欺者黜之不具數以有原石拓本易致可對較也又道咸間及近年京師各省帖估偽造石象小墓志杜撰人名襲取年月日建規摹字體及磨改唐石添刻年月等類識其源流真偽顯然不辨自明亦盡黜之後人不得目爲脫漏執以據補所以別僞

一通錄例 前人著錄或援地志或據引書未見原石拓本甚有名字割裂失理者又本文雖無朝代年月而有官秩州郡事蹟在隋後者又或不著年月事實僅有題名造象緣起而字體文義與南北

朝判然不類確屬唐石者又或無朝代年月有宮
秩州郡顯分南北而舛錯凌雜誤屬者不爲攷辨
率多誤入皆未細審之故今凡未見拓本及介在
疑似者概置不錄又南北朝官秩廢置地名沿革
州郡併省舊史疏略不盡可攷石刻所著每多與
史岐然詳其文義事理率有踪跡可尋兼可互證
要非唐宋所有故不得概執史以律之碑文多出
自當時文人正可據以補史闕造象刻石則出自
工匠字體又多無理假借不能盡以文義拘責又
當時華夷擾攘改元紛繁一時所屬偏僻有未奉

到元號致年月前後稍有差池及字有譌脫者層見疊出然稿非偽記仍依原石錄入而以小字旁注遇有義例須注明者亦以小字旁注不爲泛言所以示慎

一詳錄例 造像墓志零星殘石爲人家收藏者輒轉無定茲以近年見存某處某氏者爲斷又凡一碑四面有陰有側俱刻字者拓本紙不連屬陰側尙屬易辨至造象一石有兩旁題名及上列下列各題字巨者有類碑側小者文字簡略往往或一石數事如一石數事者止著其有年月者之主名其不別著年月雖另起一事或題名或畫

像人名或文理不全或文無起訖首尾等類而細
淺已甚者皆不復著以有繫年月之主名在前以
統之得其拓本牽連自見以免瑣碎至其附著有
闕記錄恐致忽略者仍附著於其有主名者一種
下且有前後彼此牽連各不相應拓時紙不連屬前
連互著者以免疏漏
人著錄所收每多誤爲分合致一石分著爲數名
或兩石誤合爲一種多有牽混今詳攷原石上下
四旁起訖錄其主名不復誤從使後人滋疑所以
歸實

一備錄例 此類在外有曾經前人著錄原石見存
一時艱致未見拓本不敢懸定主名者俱別錄一
冊存查備入不在此內以待搜補又如順天房山

雷音洞佛經之一百四十四石山西太原風峪佛
經之一百二十六石皆係齊隋古刻惟所見拓本
不全年月亦無從詳實皆暫置不錄以俟訪補至
新出日多限於聞見尙望同志隨時相示以匡不
逮所以待後

梁家坡石坐刻辭

光緒庚寅十一月以梁家坡石付琉璃廠工製坐并系
此語懿榮謹記

松山一角海色蒼茫夢魂千里風雨龍岡

崇煥謹案梁家坡爲 先王父墓地時 先文敏

公服官京師敬攜此石以誌懷僊之思

鼉磯島石硯銘

黃縣菴哇三兄往歲主君子洲院講席以此硯見寄因
以銘之養潛居士記

鼉磯島海四圍鑿開雲骨雪濤飛化爲此硯有光輝寒
星熠熠墨霏霏我從坡仙乞取歸

王文敏公遺集卷第四